

四庫全書

集部

欽定四庫全書

集部

唐詩紀事卷

三五

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣劉能

謄錄貢生臣李璜

欽定四庫全書

唐詩紀事卷三

宋 計敏夫 撰

武后

徐賢妃

上官昭容

越王貞

韓王元嘉

孔紹安

鄭世翼

董思恭

何仲諠

沈叔安

陸敬

袁朗

牛鳳及

朱子奢

庾抱

張文恭

陳叔達

薛收

武后

天授二年臘卿相欲詐稱花發請幸上苑有所謀也許之尋疑有異圖乃遣使宣詔曰明朝遊上苑火急報春知花須連夜發莫待曉風吹於是凌晨名花布苑羣臣咸服其異后託術以移唐祚此皆妖妄不足信也大凡后之詩文皆元萬頃崔融輩為之

同太平公主遊九龍潭則天御製云山窓遊玉女澗戶對瓊峰巖頂翔雙鳳潭心倒九龍酒中浮竹葉杯上寫芙蓉故驗山家賞唯有入松風

萬歲通天元年鑄九鼎成置於東都明堂之庭后自製
曳鼎歌令曳者唱和焉開元二年太子賓客薛謙光獻
東都九鼎銘其蔡州鼎銘武后所制文曰犧農首出軒
昊膺期唐虞繼踵湯禹垂時天下光宅域內雍熙上玄
降鑒方建隆基紫微令姚元崇奏曰聖人啓運休兆必

彰請宣付史館

明皇御名
已兆於此

徐賢妃

秋風函谷應詔云秋風起函谷勁氣動河山偃松千嶺

上離雨二陵間低雲愁廣隰落日慘潼關此時飄紫氣
應驗真人還

長安崇聖寺有賢妃粧殿太宗曾召妃久不至怒之因
進詩曰朝來臨鏡臺粧罷暫徘徊千金始一笑一召詎
能來

貞觀二十三年上疏諫太宗息兵罷役其略曰大業者
易驕願陛下難之善始者難終願陛下易之又曰漆器
非延叛之方桀造之而人叛玉杯豈招亡之術紂用之

而國亡侈麗之源不可不遏作法於儉猶恐其奢作法於奢何以制後

賢妃名惠湖州人生五月能言四歲通論語八歲曉屬文父孝德嘗試使擬離騷為小山篇曰仰幽巖而流盼撫桂枝以凝想將千齡兮此遇荃何為兮獨往孝德大驚知不可掩於是所論著遂傳太宗知之名為才人遷充容永徽元年卒贈賢妃弟齊聃子堅皆以學名

上官昭容

綵書怨云葉下洞庭初思君萬里餘露濃香被冷月落
錦屏虛欲奏江南曲貪封薊北書書中無別意唯悵久
離居

九月九日上幸慈恩寺登浮圖羣臣上菊花壽酒賦詩
婕妤獻詩云帝里重陽節香園萬葉來却邪萸入佩獻
壽菊傳杯塔類承天湧門疑待佛開睿詞懸日月長得
御昭回

十月駕幸三會寺婕妤獻詩云釋子談經處軒臣刻字

留故臺遺老識殘簡聖皇求駐蹕懷千古開襟望九州
四山緣塞合二水夾城流宸翰陪瞻仰天杯接獻酬太
平詞藻盛長願託鴻休

中宗立春日遊苑迎春昭容應制云密葉因裁吐新花
逐剪舒攀條雖不謬摘藥詎知虛春至由來發秋還未
肯疎借問桃將李相亂欲何如

長寧公主流杯池六首

玉環騰遠創金埒荷殊榮弗玩珠璣飾仍留仁智情鑿

山便作室憑樹即為楹公輸與班尔從此遂韜聲其一

登山一長望正遇九春初結駟填街術閭闔滿邑居鬪

雪梅先吐驚風柳未舒直愁斜日落不畏酒樽虛其二

霽曉氣清和披襟賞薜蘿玳瑁凝春色琉璃漾水波跂

石聊長嘯攀松乍短歌除非物外者誰就此經過其三

暫爾遊山第淹留惜未歸霞牕明月滿澗戶白雲飛書

引藤為架人將薜作衣此真攀翫所臨晚賞光暉其四

放曠出煙雲蕭條自不群激流清意府隱几避囂氛石

畫裝苔色風梭織木文山室何為貴唯餘蘭桂薰

其五

策杖臨霞岫危步下霜蹊志逐深山靜途隨曲澗迷漸

覺心神逸俄看雲霧低莫恠人題樹祇為賞幽棲

其六

七言沁水田園先自多齊城樓觀更無過倩語張騫莫

辛苦人今從此識天河

其一

參差碧岫聳蓮花潺湲綠水瑩金沙何須遠訪三山路

人今已到九仙家

其二

憑高瞰迥足怡心菌閣桃源不暇尋餘雪依林成玉樹

殘雲點岫即瑤岑

其三

五言
九首
攀藤招逸客
偃桂叶幽情
水中看樹影
風裏聽松

聲

其一

携琴待叔夜
負局訪安期
不應題石壁
為記賞山時

其二

泉石多仙趣
巖壑寫奇形
欲知堪悅耳
唯聽水泠泠

其三

巖壑恣登臨
瑩目復怡心
風篁類長笛
流水當鳴琴

其四

懶步天台路
惟登地肺山
幽巖仙桂滿
今日恣情攀

其五

暫遊仁智所
蕭然松桂情
寄言棲遁客
勿復訪蓬瀛

其六

瀑溜晴疑雨叢篁畫似昏山中真可翫暫請報王孫

其七

傍池聊試筆倚石旋題詩預彈山水調終擬從鍾期

其八

橫鋪豹皮褥側戴鹿胎巾借問何為者山中有逸人

其九

四言檀欒竹影颺颺松聲不煩歌吹自足娛情

其一

仰循茅宇俯眇喬枝煙霞問訊風月相知

其二

枝條鬱鬱文質彬彬山林作伴松桂為隣

其三

清波洶湧碧樹冥蒙莫恠留步因攀桂叢

其四

莫論圓嶠休說方壺何如魯館即是仙都

其五

三言 逐仙賞展幽情踰崑閬邁蓬瀛其一

遊魯館陟秦臺汗山壁愧瓊瓌其二

張說作昭容文集序云古者有女史記功書過有女尚書決事宮閣昭容兩朝專美一日萬幾顧問不遺應接如響雖漢稱班媛晉譽左嬪文章之道不殊輔佐之功則異迹祕九天之上身沒重泉之下嘉猷令範代罕得聞庶幾後學嗚呼何仰然則大君據四海之圖懸百靈之命喜則九圍挾纊怒則千里流血靜則黔黎乂安動

則蒼忙罷弊入耳之語諒其難乎貴而勢大者疑賤而
禮絕者隔近而言輕者忽遠而意忠者忤惟窈窕柔曼
誘掖善心忘味九德之衢傾情六藝之圃故登崐廵海
之意寢剪胡刈越之威息璿臺珍服之態消從禽嗜樂
之端廢獨使溫柔之教漸於生人風雅之聲流於來葉
非夫玄黃毓粹正明助思衆妙扶識群靈扶志誕異人
之寶授興王之瑞其孰能臻斯懿乎鎮國太平公主道
高帝妹才重天人昔嘗共遊東辟同宴北渚倏來忽往

物在人亡憫雕瑄之殘言悲素扇之空曲上聞天子求椒房之故事有命史臣叙蘭亭之新集

中宗正月晦日幸昆明池賦詩羣臣應制百餘篇帳殿前結綵樓命昭容選一首為新翻御製曲從臣悉集其下須臾紙落如飛各認其名而懷之既進唯沈宋二詩不下又移時一紙飛墜競取而觀乃沈詩也及聞其評曰二詩工力悉敵沈詩落句云微臣彫朽質羞覩豫章材蓋詞氣已竭宋詩云不愁明月盡自有夜珠來猶陟

健舉沈乃伏不敢復爭宋之問詩曰春豫靈池近滄波
帳殿開舟凌石鯨動查拂斗牛廻節晦冥全落春遲柳
暗催象溟看浴景燒劫辨沉灰鎬飲周文樂沔歌漢武
才不愁明月盡自有夜珠來

昭容名婉兒西臺侍郎儀之孫父廷芝與儀死武后時
母鄭方妊夢巨人界大秤曰持此稱量天下昭容生踰
月母戲曰稱量者豈爾耶輒啞然應後內秉機政符其
夢云自通天以來內掌詔命中宗立進拜昭容帝引名

儒賜宴賦詩婉兒常代帝及后長寧安樂二公主衆篇
並作而采麗益新又差第群臣所賦賜金爵故朝廷靡
然成風當時屬辭大抵浮靡然皆有可觀昭容力也韋
后之敗斬闕下

中宗幸温湯獻三絕句云三冬季月景龍年萬乘觀風
出灞川遙看電躍龍為馬迥矚霜原玉作田

鸞旗掣曳拂雲迴羽騎驂驪躡景來隱隱驪山雲外聳
迢迢御帳日邊開

翠幕朱帷敞月營金罍玉笋泛蘭英歲歲年年常扈蹕
長長久久樂承平

貞元十四年崔仁亮於東都買得研神記一卷有昭容
列名書縫處呂溫感歎因賦上官昭容書樓歌云漢家
婕妤唐昭容工詩能賦千載同自言才藝是天真不服
丈夫勝婦人歌闌舞罷閑無事縱恣優游弄文字玉樓
寶架中天居緘竒秘異萬卷餘水精編帙綠鈿軸雲母
擣紙黃金書風飄花露清旭時綺窓高挂紅綃帷香囊

盛煙繡結絡翠羽拂紫青琉璃吟披嘯卷紛無已皎皎
淵機破研理詞縈綵翰紫鸞迴思耿寥天碧雲起碧雲
起心悠哉境深轉苦坐自催金梯珠履聲一斷瑤堦日
夜生青苔青苔祕仙關曾比羣玉山神仙杳何許遺逸
滿人間君不見洛陽南市賣書肆有人買得研神記紙
上香多蠹不成昭容題處猶分明令人惆悵難為情

高宗後苑雙頭牡丹昭容詩云勢如連壁友心似臭蘭
人

越王貞

和過溫湯詩
鳳輦騰宸駕
驪籞次乾遊
坎德踈溫液
山隈派暖流
寒氛空外擁
蒸氣沼中浮
林凋帷影散
雲斂蓋陰收
霜郊暢玄覽
參差落景道

貞善騎射涉文史有吏幹為宗室材王中宗廢居房陵
貞為豫州刺史垂拱四年八月起兵圖反正事兵敗及
禍

韓王元嘉

奉和同太子監守違戀詩云乾象開層屋離明啟少陽
卜征從獻吉守器屬元良逝矣凌周誦遙哉掩漢莊好
士傾南洛多才盛北場地分丹鷲嶺途開白雲鄉儲誠
爰曉夕宸愛積炎涼珠璧連霄漢萬物仰重光高宗為太子也
元嘉高祖子垂拱中刺絳州與越王子冲圖舉兵冲敗
元嘉至京師謀泄后逼令自殺孟利正嘗稱其文曰劉
隣之周思茂不過也

孔紹安

石榴詩可惜庭中樹移根逐漢臣只為時來晚開花不及春

咏天桃云結葉還臨影飛香欲徧空不意餘花落翻沉露井中

紹安大業末為監察御史高祖為隋討賊河東紹安監其軍深見接遇高祖受禪紹安自洛陽間行來奔高祖大悅拜內史舍人時夏侯端亦嘗為御史先來歸紹安授秘書監因侍宴咏石榴有祇為時來晚開花不及春

之句武德中令狐德棻欲補正歷代史記各差官主修
一代紹安以中書舍人與崔善為蕭德言主梁多歷年
不能就皆罷之紹安在隋時與孫萬壽以文辭稱時謂
孫孔

紹安贈蔡君詩云疇昔同幽谷伊爾遷喬木赫奕盛青
紫討論窮簡牘

賦結客少年場云結客佩吳鉤橫行度隴頭鴈在弓前
落雲從陣後浮吳師驚燧象燕將警奔牛轉蓬飛不息

冰河結未流若使三邊定當封萬戶侯

鄭世翼

過巖君平古井詩云巖平本高尚遠蹈古人風賣卜成
都市流名大漢中舊井改人世寒泉久不通年多既罷
汲無禽乃遂空如何屬秋氣唯有雙井桐

看新婚詩云初筭夢桃李新粧應標梅疑逐朝雲去翻
隨暮雨來雜珮含風響叢花隔扇開姮娥對此夕何用
久徘徊

登北印還至京洛詩云步登北印阪踟躕聊寫望宛洛
盛皇居規模窮大壯三河分設險兩峻資巨防飛觀紫
煙中層臺碧雲上青槐夾馳道迢迢脩且曠左右多第
宅參差居將相清晨謁帝返車馬相追訪胥徒各異流
文物紛殊狀囂塵暗天起簫管從風颺伊余忠且直生
平獨淪喪山幽有桂叢何為坐惆悵

世翼滎陽人武德時為揚州錄事參軍數以言忤物有
崔信明者嘗矜其文謂過李百樂世翼過之江中謂曰

聞公有楓落吳江冷願見其餘信明欣然多出衆篇世
翼覽未終曰所見不逮所聞投諸水引舟去貞觀時坐
怨謗流死雋州

世翼巫山高云巫山凌太清峒堯類削成霏霏暮雨合
靄靄朝雲生危峰入鳥道深谷寫猿聲別有幽棲客淹
留攀桂情

董思恭

星詩云歷歷東井舍昭昭右掖垣雲際龍文出池中鳥

色翻流暉下月路墮影入河源方知潁川集別有太邱門

雪詩云天山飛雪度言是落花朝惜哉不我與蕭索健風飄鮮潔凌紈素紛糝下枝條良書竟何在坐見容華銷

虹詩云春暮萍生早日落雨飛餘橫彩分長漢倒色媚清渠梁前朝影出橋上晚光舒願逐旌旗轉廳廳侍直廬

霧詩云蒼山寂已暮翠觀黯將沉終南晨豹隱巫峽夜
猿吟天寒氣不歇景晦色方深待訪公超市將予赴華
陰

詠日云滄海十枝暉玄圃重輪慶薜華發晨檻凌彩翻
朝鏡忽遇驚風飄自有浮雲映更也人皆仰無待揮戈
正

昭君怨云琵琶馬上彈行路曲中難漢月正南遠燕山
直北寒髻環風拂破眉黛雪沾殘斟酌紅顏改徒勞握

鏡看

詠月云北堂未安寢西園聊騁望玉戶照羅幃珠軒明
綺幃別客長安道思婦高樓上所願君莫遺清風時可
訪

野郊愴新別河橋非舊餞慘日映峰沉愁雲隨蓋轉哀
笳時斷續悲旌乍舒卷望望情何極浪浪淚空泣無復
昔時人芳春共誰遣

詠琵琶云半月無雙影金花有四時摧藏千里態掩抑

幾重悲促節紫紅袖清音滿翠帷
駛彈風響急緩曲釧
聲遲空餘闌隴恨因此代相思

詠弓詩云上弦明月半激箭流星遠落鴈帶書驚啼猿
映枝轉

詠桃詩云禁苑春光麗花蹊幾樹裝綴條深淺色點露
參差光向日分千笑迎風共一香如何仙嶺側獨秀隱
遙芳

詠李詩云盤根植瀛渚交榦橫倚天舒華光四海卷葉

蔭三川

守歲詩云暮景斜芳殿年華麗綺宮寒辭去冬雪暖帶
入春風階馥舒梅素盃花卷燭紅共歡新故歲迎送一
宵中

又云歲陰窮暮紀獻節啟新芳冬盡今宵促年開明日
長冰銷出鏡水梅散入風香對此歡終宴傾壺待曙光
思恭高宗時中書舍人同撰瑶山玉彩

何仲誼

七夕賦詠成篇云日日思歸勤理鬢朝朝佇望懶調梭
凌風寶扇遙臨月映水仙車遠渡河歷歷珠星疑拖珮
冉冉雲衣似曳羅通霄道意終無盡向曉離愁已復多
仲諠武德貞觀間人也

沈叔安

七夕賦詠成篇云皎皎霄月麗秋光耿耿天津橫復長
停梭且復留殘緯拂鏡及早更新粧彩鳳齊駕初成輦
雕鵲填河已作梁雖喜得同今夜枕還愁重空明日牀

南部新書云武德七年遣刑部尚書沈叔安携天尊像賜高麗後為潭州都督圖形凌煙閣

凌敬

七夕詩云夙駕鳴鑾啓闔闔霓裳遙裔儼天津五明霜紈開羽扇百和香車動畫輪婉孌夜分能幾許靚粧冶服為誰新片時歡娛自有極已復長望隔年人

敬有集十四卷高祖時人也初為竇建德國子祭酒秦王軍武牢建德軍迫於武牢不得進敬說令取懷州踰

太行入上黨趨壺口駭蒲津乘唐國之虛以取山北建
德不從以及於敗其偽官屬皆降唐

袁朗

秋日應詔詩云玉樹涼風舉金塘細草萎葉落商飈觀
鴻歸明月池迎寒桂酒熟含霧菊花垂一奉章臺宴千
秋長願斯

朗父樞仕陳為德教殿學士陳亡入隋唐初朗為秦王
府文學太宗時為給事中卒帝曰朗任淺而性謹厚使

人悼惜

賦飲馬長城窟云朔風動秋草清蹕長安道長安運不
窮所以隔華戎規模唯聖作荷負曉成功鳥庭已向內
龍荒更鑿空玉闕塵卷靜金微路已通湯征隨北怨舜
詠起南風盡野功初立綏邊事云集朝服踐狼居凱歌
旋馬邑山響傳鳳吹霜華藻瓊釵屬國擁節歸單于款
關入日落寒風起驚河被原隰零落葉已寒河流清且
急四時徭役靜千載干戈戢太平今若斯汗馬意無施

唯當事筆硯歸去草封禪

牛鳳及

奉和受圖溫洛詩云八神文玉輦六羽警瑤溪戒道伊
川北通旌澗水西御圖開洛匱刻石與天齊瑞日波中
上仙禽霧裡低微臣矯弱翮忭舞接鸞鷲

劉軻與馬植論史官書云文皇帝受命有若魏鄭公揚
仁卿牛鳳及

朱子奢

文德皇后挽歌云神京背紫陌駟結行軒北失橫橋
道西分清渭流寒光向壟沒霜氣入松楸今日泉臺路
非是濯龍遊

子奢蘇州人貞觀時為諫議大夫善文辭為人樂易能
劇談以經誼緣飾每侍宴帝令論難羣臣

庾抱

賦得胥臺露詩云胥臺既落室荆棘稍侵扉棟折連雲
影梁摧照日暉翔鶴遂不返巢燕反無歸唯有團階露

承曉共霑衣

抱仕隋為元德太子學士高祖起兵太子封隴西公以
抱為記室文檄皆出其手俄為東宮學士貞觀初徙趙
王反卒

張文恭

七夕詩云鳳律驚秋氣龍梭靜夜機星橋百枝動雲路
七香飛映月迴雕扇凌雲曳綺衣含情向華幄流態入
重闈歡餘夕漏盡怨結曉驂歸誰念分河漢還憶兩心

違

文恭貞觀時人與房元齡辛邱馭李懷儼趙洪智劉禕
之楊仁卿上官儀李淳風等同修晉書名為御樓

陳叔達

字子聰陳宣帝子武德初判納言太宗時拜禮部尚書
明辨善為容

初年詩云和風起天霧嚴氣銷冰井索索枝未柔厭厭
漏猶永

春首詩云雪花聯玉樹冰彩散瑤池翔禽遙出沒積翠
遠參差

又早春桂林殿應詔詩云金鋪照春色玉律動年華朱
樓雲似蓋丹桂雪如花水岸銜堦轉風條出柳斜輕輿
臨太液仙露酌流霞

聽鄰人琵琶詩云本自龍門桐因妍入漢中香由羅袖
裏聲逐朱絃中離有相思韻翻將入塞同關山臨却月
花蘂散迴風為將金谷引添令曲未終

薛收

琵琶賦云惟茲器之為宗
摠群樂而居妙應清角之高
節發號鐘之雅調處躁靜之中
權執踈密之機要遏浮雲而散
彩揚白日以垂耀爾其狀也龍
腹鳳頭熊據龍旋戴曲履直破
觚成圓虚心內受勁質外宣磅
礪象地穹崇法天候八風而運
軸感四氣而鳴絃金華徘徊而
月照玉桂的歷以星懸

收字伯褒蒲州人善屬文為秦王府主簿陝東大行臺

金部郎中武德七年卒太宗即位語元齡曰收若在朕
當以中書令處之收與弟德音元欽齊名號河東三鳳
收為長雖德音為鸞鷲元敬年最少為鸕雛

唐詩紀事卷三

欽定四庫全書

唐詩紀事卷四

宋 計敏夫 撰

王珪

褚亮

虞世南

蔡允恭

許敬宗

劉孝孫

魏徵

楊師道

岑文本

李百藥

來濟

長孫無忌

杜正倫

馬周

李義府

陳子良

杜之松

崔善為

王績

王珪

詠漢高祖云漢祖起豐沛乘運以躍鱗手奮三尺劍西
滅無道秦十月五星聚七年四海賓高抗威宇宙貴有
天下人憶昔與項王契闊時未伸鴻門既薄蝕滎陽亦
蒙塵蟻虱生介冑將卒多苦辛爪牙驅信越腹心謀張
陳赫赫西楚國化為邱與榛

詠淮陰侯韓信云秦王日凶慝豪傑爭共亡信亦胡為
者劍歌從項梁項羽不能用脫身歸漢王道契君臣合
時來名位彰北討燕承命東驅楚絕糧斬龍堰淮水擒

豹燭夏陽功成享天祿建旗還南昌金千荅漂母錢百
酬下鄉吉凶成糾纏倚伏難預詳弓藏狡兔盡慷慨令
心傷

珪字叔玠相太宗母李最賢老杜詩有我之曾老姑爾
之高祖母謂李也

褚亮

字希明錢塘人警敏工為詩貞觀中為散騎常侍武德
四年太宗為天策上將軍宮城西開文館下教以杜如

晦房元齡于志寧蘇世長薛收褚亮姚思廉陸德明孔
穎達李玄道李守素虞世南蔡允恭顏相時許敬宗薛
元敬蓋文達蘇勗並以本官為學士收卒以劉孝孫補
之使亮為贊

奉和詠日午詩云曦車日亭午浮箭未移暉日光無落
照樹影正中圍草萎者稍靡葉燥望疑稀晝寢慙經笥
暫解入朝衣

燭花詩云蘭徑香風滿梅梁暖日斜言是東方騎來尋

南陌車塵星臨夜燭眉月隱輕紗莫言春稍晚自有鎮
開花

賦蜀都詩云列宿光輿井分土跨梁岷沉犀對江浦駟
馬入城闈英圖多霸跡歷選有名臣連騎簪纓滿含章
詞賦新得上僊槎路無待訪嚴遵

秋鴈云日暮霜風急羽翮轉難任為有傳書意翩翩入
上林

秋享送文舞用舒和歌云御宸合宮承寶歷帝圖重館

奉明靈偃武修文九圍泰沉烽靜柝八荒寧

祀五方用舒和歌云笙歌籥舞屬年韶鷺鼓鳧鐘展時
豫調露初迎綺春節承雲遽踐蒼霄馭

樂府詞云高臺暫俯臨飛翼聳輕音浮光隨日度漾影
逐波深迥瞰周平野開懷暢遠襟獨此三休上還傷千
里心

奉和禁苑餞別應令詩云大藩初錫瑞出牧邇皇京暫
以綠車重言承朱邸榮舒桃臨遠騎垂柳映軍營惠化

宣千里威風動百城禁禦芳嘉節神襟餞送情金笳催
別景玉管切離聲野花開且落山鳥哢還驚微臣夙多
幸薄宦奉儲明釣臺慙作賦伊水濫聞笙懷德良知久
酬恩識命輕

和望月應魏王教詩云層軒澄皎月流照滿中天色共
梁珠遠光隨趙壁圓落影臨秋扇虛輪入夜弦所欣東
館裏預奉西園篇

虞世南

和鑿輿頰戲下詩云重輪依紫極前耀奉丹霄天經戀
宸宸帝命扈仙鑣乘星開鶴禁帶日下虹橋銀書含曉
色金路轉晨颺霧澈軒營近塵暗苑城遙蓮花分秀萼
竹箭下驚潮撫已慙龍幹承恩集鳳條瑤山盛風樂抽
簡薦徒謠

侍宴應詔詩云芬芳禁林晚容與桂舟前橫空一鳥度
照水百花燃綠野明斜日青山澹晚煙濫得陪終宴握
管類窺天

奉和詠日午詩曰高天淨秋色長漢轉曦車玉樹陰初
正桐圭影未斜翠蓋飛圓影明鏡發輕花再中良表瑞
共仰璧暉賒

奉和月夜觀星應令詩曰早秋炎景暮初弦月彩新清
風滌暑氣零露淨鷺塵薄霧銷輕縠鮮雲卷夕鱗休光
灼前曜瑞彩接重輪緣情搞聖藻並作命徐陳宿草誠
踰濫吹噓偶縉紳天文豈易述徒知仰北辰

又春夜詩云春苑月徘徊竹堂侵夜開驚鳥排林度風

花隔水來

凌晨早朝云萬瓦宵光曙重簷夕霧收玉花停夜燭金
壺送曉籌日暉青瑣殿霞生結綺樓重門應啓路通籍
引王侯

詠舞詩云繁絃奏淶水長袖轉迴鸞一雙俱應節還似
鏡中看

賦得吳都詩云畫野通淮泗星躔應斗牛玉牒宏圖表
黃旗美氣浮三分開霸業萬里宅神州高臺臨茂苑飛

閣跨澄流江濤如素蓋海氣似朱樓吳趨自有樂還似
鏡中遊

賦飲馬長城窟云馳馬渡河干流深馬渡難前途錦車
使都護在樓蘭輕騎猶銜勒疑兵尚解鞍溫池下絕澗
棧道接危巒拓地勲未賞亡城律詎寬有月關猶暗經
春隴尚寒雲昏無復影冰合不聞湍懷君不可遇聊持
報一餐

賦鶴云飛來雙白鶴奮翼遠凌煙俱棲集紫蓋一舉背

青田颺影過伊洛流聲入管絃鳴儔倒景外刷羽闈風
前顧步已相失徘徊各自憐危心猶警露哀響詎聞天
無因振六翮輕舉復隨仙

賦結客少年場云韓魏多奇節倜儻遺名利共矜然諾
心各負縱橫意結交一言重相思千里至綠沈明月弦
金絡浮雲轡吹簫入吳市擊筑遊燕肆尋源博望侯結
客遠相求少年垂一顧長驅背隴頭燄燄戈霜動耿耿
劍虹浮天山冬夏雪交河南北流雲起龍沙暗木落鴈

行秋輕生徇知己非是為身謀

怨歌行云紫殿秋風冷雕甍落日沉裁紈悽斷曲織素
別離心掖庭若改畫長門不惜金寵移恩稍薄情疎恨
轉深香銷翠羽帳絃斷鳳凰琴鏡前紅粉歇階上綠苔
侵誰言掩歌扇翻作白頭吟

門有車馬客云陳遵重交結田蚡擅豪華曲臺臨上路
高門抵狹斜赭汗千里馬繡轂五香車白鶴隨飛蓋朱
鷺入鳴笳夏蓮開劍水春桃發綬花輕扇染回雪浮蟻

泛流霞逢恩借羽翼失路委泥沙

擬古云塗山烽堠驚弭節度龍城冀馬樓蘭將燕犀上
谷兵劍寒花不落弓曉月逾明凜凜嚴霜節冰壯黃河
絕蔽日卷征蓬浮天散飛雪全兵值月滿精騎乘膠折
結髮早驅馳辛苦事旌麾馬凍重關冷輪摧九折危獨
有西山將年年屬數奇

燿火發金微連營出武威孤城寒雲起絕陣虜塵飛俠
客吸龍劍惡少縵胡衣朝摩骨都壘夜解谷蠡圍蕭關

遠無極蒲海廣難依沙磴離旌斷晴川候馬歸交河梁
已畢燕山旆欲揮方知萬里相侯服有光輝

顏師古隋朝遺事載洛陽獻合蒂迎輦花煬帝令袁寶
兒持之號司花女時詔世南草征遼指揮德音敕於帝
側寶兒注視久之帝曰昔傳飛燕可掌上舞今得寶兒
方昭前事然多憨態今注目於卿卿才人可便嘲之世
南為絕句曰學畫鴉黃半未成垂肩褰袖大憨生綠憨
却得君王惜長把花枝傍輦行

世南越州人仕太宗帝每稱其有五絕德行忠直博學
文詞書翰也既卒帝曰世南於我猶一體拾遺補闕無
日忘之蓋當代名臣人倫準的今其云亡石渠東觀中
無復人矣

蔡允恭

允恭在隋時奉和出潁至淮詩云久倦川涂曲忽此望
淮圻波長泛淼淼眺迥情依依稍覺金烏轉漸見錦帆
稀欲知仁化洽謳歌滿路歸

允恭荊州江陵人工為詩在隋時煬帝有所賦必令諷
誦遣教宮人允恭恥之授內史舍人固辭繇是疎斥隋
亡歸唐貞觀初除太子洗馬卒

許敬宗

奉和正日臨朝云天正開初節日觀上重輪百靈滋景
祚萬土慶維新待旦敷玄造韜旒御紫宸武帳臨光宅
文衛象鈎陳廣庭揚九奏大帛麗三辰發生同化育播
物體陶鈞霜空澄曉氣靄景瑩芳春德輝覃率土相賀

奉還淳

奉和七夕應制云牛閨臨淺漢鸞駟涉秋河兩懷縈別
緒一宿慶停梭星模鉛裏靨月寫黛中娥奈許今宵度
長嬰離恨多

又應制婺閨期今夕娥輪泛淺潢迎秋伴暮雨待暝合
神光薦寢低雲鬢呈態解霓裳喜中愁漏促別後怨天
長

七夕賦詠云一年抱怨嗟長別七夕含態始言歸聽聽

羅襪光天步灼灼新粧鑒月輝情催巧笑開星靨不惜
呈露解雲衣所歎却隨更漏盡掩泣還弄昨宵機

敬宗字延族杭州人太宗時檢校黃門侍郎高宗時中
書令在唐史姦臣傳

劉孝孫

詠笛詩云涼秋夜笛鳴流風詠九成調高時慷慨曲變
或淒清征客懷離緒鄰人思舊情幸以知音顧千載有
高聲

早發成臯望河詩云清晨發巖邑車馬走輾轅迴瞰黃
河上惆恍屢飛魂鴻流導積石驚浪下龍門仙槎不辨
處沉璧想猶存遠近洲渚出颯沓鳧鴈喧懷古空延佇
歎逝將何言

孝孫荊州人貞觀六年遷太子洗馬未拜卒

魏徵

正日臨朝應詔詩曰百靈侍軒后萬國會塗山豈如今
睿哲邁古獨光前聲教溢四海朝宗引百川鏘洋鳴玉

珮灼爍耀金蟬淑景輝雕輦高旌揚翠煙庭實超王會
廣樂盛鈞天既欣東日戶復詠南風篇願奉光華慶從
斯億萬年

出關作云中原初逐鹿投筆事戎軒縱橫計不就慷慨
志猶存杖策謁天子驅馬出關門請纓係南越憑軾下
東藩鬱紆陟高岫出沒望平原古木吟寒鳥空山啼夜
猿既傷千里目還驚久逝魂豈不憚艱險深懷國士恩
季布無二諾侯嬴重一言人生感意氣功名誰復論

徵字元成魏州人相太宗致太平天下既治懼帝喜武
功嘗賦詩曰終藉叔孫禮方知皇帝尊帝曰徵言未嘗
不約我以禮徵亡帝賦詩曰望望情何極浪浪淚空泣
無復昔時人芳春共誰遣

太宗在洛陽宮幸積翠池宴酣各賦一事帝賦尚書曰
日昃翫百篇臨燈披五典夏康既逸豫商辛亦流泗恣
情昏主多克已明君鮮滅身資累惡成名由積善徵賦
西漢曰受降臨軹道爭長趣鴻門驅傳渭橋上觀兵細

柳屯夜宴經栢谷朝遊出杜原終藉叔孫禮方知皇帝
尊帝曰徵言未嘗不約我以禮

楊師道

字景猷清警有才思貞觀十年拜侍中叅預朝政後為
太常卿每與文士宴歌詠自適帝見其詩為吟諷嗟賞
後賜宴帝曰聞公每酣賞捉筆賦詩如宿成試為朕為
之師道再拜少選輒成無所竄定一坐嗟伏

春朝閑步詩云偃沐乘閑豫清晨步出林池塘藉芳草

蘭芷襲幽衿霧中分曉日花裏弄春禽野徑香常滿山
階荀屨侵何須命輕蓋桃李自成陰

又初秋夜坐應詔詩云玉瑄涼初應金壺夜漸闌滄池
流稍潔仙掌露方溥鴈聲風處斷樹影月中寒爽氣長
空淨高吟覺思寬

賦終南山用風字韻應詔詩云眷言懷隱逸輟駕踐幽
叢白雲飛夏雨碧嶺冠春虹草綠長楊路花踈五柞宮
登臨日將晚蘭桂起香風

詠硯云圓池類璧水輕翰染煙華將軍欲定遠見棄不
應賒

詠飲馬應詔詩云寶馬權奇出未央雕鞍照耀紫金裝
春草初生馳上苑秋風欲動醉長楊鳴珂屢度章臺側
細蹠徑向濯龍傍徒令漢將連年去宛城今已獻名王
詠弓詩云霜重麟膠勁風高月影圓烏飛隨帝輦鴈落
逐鳴弦

還山宅詩云暮春還舊嶺徙倚玩年華芳草無行徑空

山正落花垂藤掃幽石卧柳礙浮槎鳥散茅簷靜雲披
澗戶斜依然此泉路猶是昔煙霞

彈鳴琴詩云北林鶻夜飛南軒月馭進調絃發清徵蕩
心祛褊恠變作離鴻聲還入思歸引長嘆未終極秋風
飄素鬢

又詠琴詩云久擅龍門質孤竦嶧陽名齊娥初發弄趙
女正調聲嘉客勿遽反繁絃曲未成

詠笙詩云短長挿鳳翼洪細摹鸞音能令楚妃歎復使

荆王吟切切孤竹管來應雲和琴

詠舞云二八如回雪三春類早花分行向燭轉一種逐

風斜

又詠飲馬應詔曰清晨控龍馬弄影出花林蹀躞依春
澗聯翩度碧潯苔流染絲絡水潔寫調音一御瑤池駕
詎憶長城陰

賦隴頭水云隴頭秋月明隴水帶關城笳添離別曲風
送斷腸聲映雪峰猶暗乘水馬屢驚霧中寒鴈至沙上

轉蓬輕天山傳羽檄漢地急徵兵陣開都護道劍聚伏
波營於茲覺無渡方共濯朝纓

正日臨朝應詔云皇猷被寰宇端宸屬元辰九重麗天
邑千門臨上春

岑文本

字景仁鄧州人中書侍郎顏師古以譴罷太宗曰朕自
舉一人乃授文本侍郎專典機要

奉和元日臨朝云時雍表昌運日正叶靈符德蕪三代

禮功包四海圖踰沙紛在列執玉儼相趨清蹕喧輦道
張樂駭天衢拂蜺九旗映儀鳳八音殊佳氣浮仙掌薰
風繞帝梧天文光七政皇恩被九區方陪痊玉禮珥筆
岱山隅

奉述飛白書勢詩云六文開玉篆八體曜銀書飛毫列
錦繡拂素起龍魚鳳舉崩雲絕鸞驚遊霧疎別有臨池
草恩霑垂露餘

李百藥

字重規定州人隋內史令德林子也翰藻沈鬱詩尤其所長樵廝皆能諷之

正月臨朝應詔詩云化歷昭唐典承天順夏正百樂警軒禁三辰揚旆旌克庭富禮樂高燕茵簪纓獻壽符萬歲移風韻九成

少年詞云始酌丈君酒新吹弄玉簫少年不歡樂何以盡芳朝千金笑裏面一搦掌中腰掛冠豈憚宿迎拜不勝嬌寄語少年子無辭歸路遙

郢城懷古云客心悲暮序登墉瞰平陸林澤宵羊繇山
川鬱重複王公資設險名都拒江隩方城疑北門溟海
窮南服長策挫吳豕雄圖競周鹿大蒐雲夢掩壯觀章
華築人世更盛衰吉凶良倚伏遽見鄰交斷仍覩賢臣
逐南風忽不競西師日侵蹙運圯屬驅馳時屯恣敲扑
莫救夷陵火無復秦庭哭郢遂邱墟風塵俄慘黷狐
兔時遊踐霜露日霑沐釣渚故池平神臺層宇覆陣雲
埋夏首窮陰慘荒谷悵矣舟壑遷悲哉年祀倏雖異三

春望終傷千里目

百藥七歲能屬文聞中書舍人陸乂嘗過其父德林有
說徐陵文者云刈瑯琊之稻坐客並不識其事百藥進
曰傳稱邠人藉稻注云邠國在瑯琊開陽縣人皆驚喜
云此兒即神童百藥幼多疾父母以百藥為名名臣之
子才行相繼四海名流莫不宗仰藻思沉鬱尤長五言
雖樵童牧子亦皆吟諷及懸車告老怡然自得穿池築
山文酒譚賓以盡平生之志年八十五先是和太宗帝

京篇手詔曰卿何身之老而才之壯齒之宿而意之新
乎子安期永徽末遷中書舍人自德林至安期三代掌
制誥安期孫義仲又為中書舍人

出譚
賓錄

來濟

揚州人父護兒濟貞觀十八年初置太子司議郎高其
選以濟為之永徽中為相世謂護兒兒作相世南男作
匠是也。

濟出玉關絕句云歛轡遵龍漢銜悽渡玉關今日流沙

外垂涕念生還

太宗餞中書侍郎來濟詩云曖曖去塵昏
灞岍飛飛輕蓋指河梁雲峰衣結千重葉
雪岫花開幾樹粧深悲黃鶴孤舟遠獨
歎青山別路長聊將分袂霑襟淚還用
持添離席觴

長孫無忌

無忌嘲歐陽詢形狀猥陋云聳膊成山
字埋肩畏出頭誰家麟閣上畫此一獼
猴詢應聲曰索頭連背暖漫褱

畏肚寒祇緣心渾渾所以面團團太宗笑曰詢殊不畏
皇后耶

太宗嘗謂唐儉酒杯流行發言可喜是時天下初定君
臣俱欲無為酒杯善謔理亦有之高宗雖不君然亦深
察事機當時諸王鬪鷄王勃在沛王府戲為文檄英王
鷄帝見之大怒曰此殆交構之漸即日竄勃以太宗之
賢杯酒一時之樂何足為後世戒及其弊也中宗詔羣
臣曰天下無事欲與羣臣共樂於是迴波艷辭妖冶之

舞作於文字之臣而綱紀蕩然矣創業之難也一觴一
詠足以肇亂況其甚焉者哉

杜正倫

相州人工屬文嘗與中書舍人董思恭夜直論文思恭
歸謂人曰與杜公評文今日覺吾頓進顯慶初為相

侍宴北門詩云大君端宸暇睿賞狎林泉開軒臨禁籞
藉野列芳筵參差歌管颺溶洩羽旗懸玉池流若釀雲
閣聚非煙湛露晞堯日薰風入舜絃大德侔玄造微物

荷陶甄謬陪瑤水宴仍廁栢梁篇闕名徒十月鄒辯詎
談天既喜光華旦還傷遲暮年猶冀升中日簪裾奉肅
然闕名徒十月
疑以傳疑

馬周

凌朝浮江旅思詩云太清上初日春水送孤舟山遠疑
無樹潮平似不流岸花開且落江鳥沒還浮羈望傷千
里長歌遣四愁

周字賓王博州人嗜學善詩春秋天資曠邁武德中補

州助教不治事刺史達奚怒數咎責周乃去客密州趙
仁本高其才厚以資使入關留客汴為浚儀令崔賢所
辱遂感激而西至長安客常何家貞觀五年太宗召之
後為中書令

李義府

遙叙封禪詩云天齊標巨鎮日觀啟崇祠宮堯臨渤海
隱嶙控河沂建岳誠為長升功亮在茲帝歆符廣運玄
範暢文思飛聲總地絡載化撫乾維瑞策開珍鳳禎圖

薦寶龜東后方肆覲西都道六師肅駕移星苑揚罕馭
風司沸鼓喧平陸凝蹕靜通達汶陽馳月羽蒙陰驚電
輜巖花颺曙輦峰葉蕩春旗石閣環藻衛金壇映黼帷
仙階溢秘柜靈檢耀祥芝三始貽遐貺萬歲受重釐菲
質陶恩獎趨迹奉軒墀觸網淪幽裔乘徼限明時周南
昔已歎卬西今復悲

詠鴛鴦詩云牽弋辭重海觸網去層巒戢翼雕籠際延
思彩霞端慕侶朝聲切離羣夜影寒能言殊可賞相助

憶長安

高宗朝義府常賦詩曰鏤月為歌扇裁雲作舞衣自憐
迴雪影好取洛川歸有棗強尉張懷慶好偷竊名士文
章乃為詩曰生情鏤月為歌扇出性裁雲作舞衣照鑑
自憐迴雪影來時好取洛川歸時人為之語曰活剝張
昌齡生吞郭正一

義府初遇以李大亮劉洎之薦太宗召令詠烏義府曰
日裏颺朝彩琴中聞夜啼上林如許樹不借一枝棲帝

曰與卿全樹何止一枝

義府擅殺寺丞畢正義王義方彈義府疏云臣聞履霜
堅冰積小成大請乞重勘當畢正義致死之由雪冤氣
於幽泉誅姦臣於白日對仗叱義府不退義方三叱上
既無言義府趨出義方乃讀彈文義府善柔成性佞媚
為心昔事馬周分桃見寵後交劉洎割袖承恩生其羽
翼長其光價因緣際會遂階通達不能盡忠端節對敷
王休策蹇勵駕祇奉皇眷而反憑附城社蔽虧日月請

託公行交遊羣小貪治容之好原有罪之淳于恐漏洩
其謀殞無辜之正義雖挾山超海之力望此猶輕迴天
轉日之威方斯更劣此如可恕孰不可容金風戒節玉
露啟途霜簡與秋典共清忠臣將鷹鷂並擊請除君側
少益鴻私碎首玉階庶明臣節伏請付法推斷以申典
憲

義府其先瀛州人與來濟俱以文翰顯時稱來李永徽
六年為相王義方庭劾之帝陰德義府故貸不問為抑

義方逐之俄進中書令後以罪流辰州朝野相賀

陳子良

詠雪云光映粧樓月花承歌扇風欲妬梅將柳故落早
春中

七夕看新婦隔巷停車詩云隔巷遥停幃非復為來遲
只言更尚淺未是渡河時

得妓詩云微雨散芳菲中園照落暉紅樹搖歌扇綠珠
飄舞衣繁絃調對酒雜引動思歸愁人當此夕羞見落

花飛

新宮詞云春色照蘭宮秦女坐窻中柳葉來眉上桃花
落臉紅拂塵開扇匣卷帳却熏籠衫薄偏憎日扇輕更
畏風

子良吳人與蕭德言庾抱同為太子學士貞觀六年卒

杜之松

和衛尉寺柳詩云漢將本屯營遼河有戍城大夫曾取
姓先生亦得名高枝拂遠鴈疎影度遙星不辭攀折苦

為入管絃聲

之松貞觀中為河中刺史答王績書云辱書知不降顏
歎恨何已僕幸恃故情庶迴高躅豈意康成道重不許
太守稱官老萊家居羞與諸侯為友延佇不獲如何如
何竒跡獨全幸甚幸甚敬想結廬人境植杖山阿林壑
地之所豐煙霞性之所適蔭丹桂藉白茅濁酒一杯清
琴數弄誠足樂也此真高士何謂狂生僕憑藉國恩濫
尸貴部官守有限就學無因延頸下風我勞何極前因

行縣實欲祇尋誠恐燉煌孝廉守琴書而不出酒泉太守列鐘鼓而空還所以遲迴遂攬轡也僕雖不敏頗識前言道既知尊榮何足恃豈不能正平公之坐敬養亥唐屈文侯之膝恭師子夏雖齊桓德薄五行無疑范睢夸人一來何損蒙借家禮今見披尋微而精簡而備誠經傳之典略閨庭之要訓也

雖夸人疑以傳疑

崔善為

呂才序王無功文集云君河中有渚田十數頃又有隱

士仲長子光服食養性君遂結廬河渚貞觀中京兆杜
之松清河崔善為繼為州刺史皆名之君曰奈何坐名
君平耶

答無功冬夜載酒鄉館詩云頌條忝貴郡懸榻久相望
處士同楊鄭邦君謝李彊詎知方擁篲逢子敬惟桑明
朝蓬戶側會自謁任棠

答無功九日詩秋來菊花氣深山客重尋露葉疑涵玉
風花似散金摘來還汎酒獨坐即徐斟王弘貪自醉無

復覓楊林

善為貝州人武德中歷尚書左丞諸曹吏惡其聽察嘲其短偃曰崔子曲如鈎隨例得封侯髀上全無項胸前別有頭高祖勞之曰齊末姦吏歌斛律明月高緯昏不察至滅其家朕雖不德幸免是下令求謗者謗遂止卒於秦州刺史

王績

晚年叙志示翟處士正師云弱齡慕奇調無事不兼修

望氣登重閣，占星上小樓。明經思待詔，學劍覓封侯。棄
繻頻北上，懷刺幾西遊。中年逢喪亂，非復昔追求。失路
青門隱，藏名白社遊。風雲私所愛，屠博暗為儔。解紛曾
霸越，釋難頗存周。晚歲聊長想，生涯太若浮。歸來南畝
上，更坐北溪頭。古岸多盤石，春泉足細流。東隅誠已謝，
西景懼難收。無謂退耕近，伏念已經秋。庚桑逢處，跪陶
潛見人。羞三晨寧舉火，五月鎮披裘。自有居常樂，誰知
身世憂。

建德破後入長安詠秋蓬示辛學士云遇坎聊知止逢
風忽未歸孤根何處斷輕葉強能飛辛答云託根雖異
所飄葉早相依因風若有便更共入雲飛

不知辛氏之名今錄於此

古意云幽人在何所紫巖有仙躅月夜橫寶琴此外將
安欲材抽嶧山幹徽點岷邱玉漆抱蛟龍脣絲纏鳳凰
足前彈廣陵罷後以明光續百金買一聲千金傳一曲
世無鍾子期誰知心所屬

竹生大夏溪蒼蒼富奇質綠葉吟風勁翠莖犯霄密霜

霰封其柯鶴鷺食其實寧知軒轅後更有伶倫出刀斧
俄見尋根株坐相失裁為十二管吹作雄雌律有用雖
自傷無心復招疾不如山上草離離保終吉

寶龜尺二寸由來宅深水浮游五湖內宛轉三江裏何
不深復深輕然至溱洧溱洧源流狹春秋不濡軌漁人
遁往還網罟相縈囿一朝失運會剗腸血流死豐骨輸
廟堂鮮腴籍籩簋棄置誰怨尤自我招此否餘靈寄明
卜復來欽所履

松生北巖下由來人徑絕布葉捎雲煙挿根擁巖穴自
言生得地獨負凌雲潔何時畏斤斧幾度經霜雪風驚
西北枝電隕東南節不知歲月久稍覺枝幹折藤蘿上
下碎枝幹縱橫裂行當糜爛盡坐共灰塵滅寧關匠石
顧豈為王孫折盛衰自有時聖賢未嘗屑寄言悠悠者
無為嗟大耋

桂樹何蒼蒼秋來花更芳自言歲寒性不知露與霜幽
人重其德徙植臨前堂連拳八九樹偃蹇二五行枝枝

自相糾葉葉還相當去來雙鴻鵠
栖息兩鴛鴦榮蔭誠不厚斤斧亦勿傷
赤心許君時此意那可忘

彩鳳欲將歸提羅出郊訪羅張
大澤已鳳入重雲颺朝栖崑閬木夕飲蓬壺漲
問鳳那遠飛賢君坐相望鳳言荷深德微禽安足尚
但使雛卵全無令矰繳放皇臣力牧舉帝樂簫韶暢
自有來巢時明年阿閣上

春日詩云前旦出園遊林華都未有今朝下堂來
池水開已久雪被南軒梅風催北庭柳遙呼竈前妾却報機

中婦年光恰恰來滿甕營春酒

績字無功絳州人兄通大儒也績誕縱與李播呂才善
大業末仕為六合丞嗜酒不任事因解去居河渚間與
仲長子光友以周易老子置牀頭他書罕讀也著五斗
先生傳醉鄉記無心子傳豫知終日自誌其墓自號東
臯子

唐詩紀事卷四

欽定四庫全書

唐詩紀事卷五

宋計敏夫撰

蕭德言

顏師古

杜淹

裴守真

胡元範

元萬頃

李敬玄

張文琮

薛春感

張大安

薛元超

鄭蜀賓

王德真

楊思玄

鄭義真

徐珩

蕭翼

張執恭

鄭軌

王勣

竇威

蕭德言

詠舞詩云低身鎔玉珮舉袖拂羅衣對簷疑鶯語映雪似花飛

德言字文行貞觀中為弘文館學士兼侍讀以年老致仕太宗不許詔曰天下無事方欲建禮作樂偃武修文卿年齒已衰教將何恃所冀才德猶茂卧振高風使濟南伏生猶在茲日拜秘書少監

顏師古

奉和正日臨朝云七政璿衡始三元寶律新負宸延百
辟垂旒御九賓肅肅皆鴛鴦濟濟盛簪紳天涯致重譯
日域獻奇珍

師古字籀自之推以來居關中性簡峭自負其才意望
甚高終於秘書監諫議大夫相時其弟也師古叔父遊
秦武德初刺廣州州人歌曰廣州顏有道性行同莊老
愛人如赤子不煞非時草高祖璽書勞勉之

杜淹

杜淹始見袁天綱於洛天綱謂曰蘭臺成就學堂寬廣
又語曰二十年外終恐責黜暫去即還武德六年以善
隱太子俱配流雋州淹至益州見天綱曰洛邑之言何
其神也天綱曰不久即回至九年六月召入天綱曰杜
公至京即得三品要職淹至京拜御史大夫檢校吏部
尚書贈天綱詩曰伊呂深可慕松喬定是虛繫風終不
得脫屣欲安如且珎紈素美當與薜蘿疎既逢楊得意
非復久閑居

淹字執禮隋時隱太白山文帝惡之謫戍江表秦王引
入為天策府曹參軍賦詩尤工賜銀鐘楊文幹反辭連
太子歸罪淹流嶺州太宗踐阼召為御史大夫後檢校
吏部尚書叅預朝政卒

裴守真

和太子納妃詩曰瑜珮升青殿穠華降紫微還如桃李
發更似鳳凰飛金屋真離象瑤臺起婺徽綵纓紛碧坐
績羽泛禴衣

雲路移彤輦天津轉明鏡仙珠照乘歸寶月重輪映望
園喜宴洽主第懽娛盛絲竹揚帝熏簪裾奉宸慶

藜雲藹曉光湛露晞朝陽天文天景麗睿藻睿詞芳玉
庭散秋色銀宮生夕涼太平超邃古萬壽樂無疆

守真絳州人高宗時太常博士天授中為司憲府丞覈
詔獄多裁恕不合武后旨出刺成州徙寧州卒

胡元範

奉和太子納妃詩云帝子威儀絕宮妃禮度優疊鼓陪

仙觀凝笳翼畫軒鬱鬱神香滃弈弈彩雲浮排空列錦
屬騰歡溢皇州

金闈未息火玉樹鍾天愛月路飾還裝星津動歸珮紫
極流宸眷清規佇慈誨恩波洽九流光輝軼千載

側席詔親賢式宴坐神仙聖文飛聖筆天樂奏鈞天曲
池涵雅景文字孕祥煙小臣同百獸率舞悅堯年

高宗子洪為太子納妃有司奏贄用白鴈適苑中獲之
帝喜曰漢獲朱鴈為樂府歌今得白鴈為婚贄婚乃人

倫首我則無慙

太子後謚
孝欽皇帝

裴炎請武后歸政后以炎有

異圖捕送詔獄元範為鳳閣侍郎曰炎有功於國臣明
其不反后曰炎有反端顧卿未知耳元範曰若炎反臣
輩亦反矣后曰朕知炎反卿輩不反遂斬炎

元範申州義陽人介廉有才以炎故流死雋州

元萬頃

春日池臺詩云日影飛花殿風紋積翠池鳳樓通夜敞
虬輦望春移

春日詩云花輕葉亂仙人杏葉密鸞喧帝女桑飛雲閣
上春應至明月樓中夜未央

又曰鳳輦迎風乘紫閣鸞車避日轉彤閣中堂促管淹
春望後殿清歌開夜扉

奉和太子納妃公主出降詩云象輅初乘鴈璇宮早結
褱離元應春夕帝子降秋期鳴瑜合清響冠玉麗濃輝
和聲躋鳳掖清影步鸞墀

從李勣征高麗為遼東道管記勣令別將赴平壤糧不

及期萬頃作離合詩密報勅勅曰軍機切遽何以詩為
欲斬之言狀乃免勅令作文檄高麗其語有不知守鴨
渌之險莫離支報云謹聞命矣遂移兵鴨渌軍不得入
萬頃坐是流嶺外遇赦還為北門學士累遷鳳閣侍郎
坐事誅

李敬玄

奉和別魯王詩云綠車旋楚服丹蹕佇秦川珠臯轉歸
騎金岍引行旃一朝限原隰千里間風煙鷺喧上林右

鳧響御溝前斷雲移魯蓋離歌動舜絃別念凝神宸崇
恩洽玳筵顧惟慙叩寂徒自仰鈞天

又奉和別越王詩云飛蓋迴蘭坂宸襟佇栢梁別館分
涇渭歸路指衡漳關山通曉色林籞徧春光帝念紆千
里詞波照玉潢

敬玄亳州人該覽羣籍尤善於禮高宗在東宮馬周薦
其材召入崇賢館侍讀後相高宗儀鳳中劉仁軌奏河
西鎮守非敬玄不可帝強遣之由是大敗於湟川魯王

靈夔高祖子也歷五州刺史越王貞太宗子武后時為
豫州刺史

張文琮

水詩云標名資上善流派表靈長地圖羅四瀆天文載
五潢方流涵玉潤圓折動珠光獨有蒙園吏棲偃玩濠
梁

賦橋詩云造舟浮渭日鞭石表秦初星文遙瀉漢虹勢
尚凌虛已授文成履空題武騎書別有臨濠上棲偃獨

觀魚

和陽舍人詠中書省花樹詩云初藥映春叢參差間早
紅因風時落砌雜雨乍浮空影照鳳池水香飄鷄樹風
豈不愛攀折希君懷袖中

文琮同潘屯田冬日早朝云假寐懷古人夙興瞻曉月
通辰禁門啟冠蓋趨朝謁霜靄清九衢霞光照雙闕紛
綸文物紀煥爛聲明發腰劍動陸離鳴玉和清越

文琮高宗宰相文瓘弟也貝州人好自寫書貞觀中為

治書侍御史永徽中拜戶部侍郎出為建州刺史卒

文宗賦蜀道難云梁山鎮地險積石阻雲端深谷下寥廓層崑上鬱盤飛梁架絕嶺棧道接危巒攬轡猶長息方知斯路難

薛春感

進船於洛水詩云禁園紆睿覽仙棹叶宸遊洛北風花樹江南彩畫舟榮生蘭蕙草春入鳳凰樓興盡離宮暮煙光起夕流

世傳春感善投壺背後執矢投之龍躍隼飛百發百中

張大安

奉別越王詩云盛藩資右戚連萼重皇情離襟愴睢苑
分途指鄴城麗日開芳甸佳氣積神京何時驂駕入還
見謁承明越王太宗子武后時為豫州刺史大安公謹
之子上元中同中書門下三品章懷太子令與劉訥言
等共註范蔚宗漢書太子廢故貶普州刺史終橫州司

馬

薛元超

和同太子監守遠戀詩云儲禁銅扉啓宸行玉輅遙空
懷壽街吏尚隔寢門朝北首瞻龍戟塵外想鸞鑣飛文
映仙誥濟惠叶神飈帝念紆蒼陞乾文煥紫霄歸塘橫
筆海平圃振詞條欲應重輪曲鏘洋韻九韶

元超收之子也高宗時為給事中轉中書舍人薦士若
任希古郭正一崔融等皆以才自名上元初同中書門
下三品政出武后因陽暗乞骸骨卒

高宗為太子也元超為舍人太宗親征時元超韓王元嘉同太子監守賦違戀詩

鄭蜀賓

蜀賓榮陽人善五言年老為江左一尉親朋餞於上東門蜀賓賦詩曰畏途方萬里生涯近百年不知將白首何處入黃泉酒酣詠歌聲調哀戚竟卒於官時長壽中也

王德真

和過温湯詩云握圖開萬寓屬聖啓千年驪阜疏緹騎
驚鴻映彩旃玉霜鳴鳳野金陣藻龍川祥煙聚危岫慶
水溢飛泉停輿興睿覽還舉大風篇

德真武后時為納言房先敏以罪貶訴於相府內史騫
味道曰太后旨劉禕之曰乃上從有司所奏云后聞貶
味道而以禕之為忠臣德真推順曰戴至德無異才惟
能歸善於君為時所服后曰善

楊思玄

湯泉詩云豐城觀漢迹溫谷幸秦餘地接幽王壘塗分
鄭國渠風威肅文衛日彩鏡雕輿遠岫凝氛重寒叢樹
影踈迴瞻建章闕佳氣滿宸居

奉和別魯王詩云元王詩傳博文后寵靈優鶴蓋動宸
眷龍章送遠遊潼關䟽別道灞岸引行舟北林分苑樹
東流溢御溝鳥聲含吹咽騎影曳花浮聖澤九垓遍天
文七曜周方圖獻雅樂簪帶奉鳴球

高宗時人

鄭義真

溫湯詩云洛川方駐蹕豐野暫停鑿湯泉常獨涌溫谷
豈知寒漏鼓依巖畔相風出樹端嶺煙遙聚草山月迥
臨鞍日用誠多幸天文遂仰觀

高宗時人

徐珩

日暮望涇水詩云導源經隴阪屬汭貫瀛都下瀨波常
急迴圻溜亦紆毒流秦卒斃泥糞漢田腴獨有迷津客

懷歸軫暮途

高宗時人

蕭翼

太宗以翼為監察御史克使取羲之蘭亭序真蹟於越僧辯才翼初作北人南遊一見歎密留宿設缸面酒江東缸面猶河北曰甕頭蓋初熟酒也酣樂之後探韻賦詩才探來字詩云初醞一缸開新知萬里來披雲同落莫步月共徘徊夜久孤琴思風長旅鴈哀非君有秘術

誰照不燃灰翼探招字詩云邂逅款良宵慙懃荷勝招
彌天俄若舊初地豈成遙酒蟻傾還泛心後躁似調誰
憐失羣翼長苦業風飄既而以術取其書以歸

本名世翼

南部新書曰蘭亭序武德四年歐陽詢就越詐求之始
入秦王府麻道嵩奉教搨兩本一送辯才一王自收道
嵩私搨一本貞觀二十三年褚遂良請入昭陵

張執恭

和平涼公觀趙郡王妓詩云小堂羅薦陳妙妓命燕秦

翠眉凝假黛紅臉自含春
合舞俱迴雪分歌共落塵
齊竽不可廁空願上龍津

賦劉生云英名振闕右雄氣逸江東
遊俠五都內來去

三秦中劍照七星影馬控千金驄
縱橫方未息因茲定

武功

劉生不知何代人齊梁以來歌為三秦遊

鄭軌

觀兄弟同夜成婚詩云棠棣開雙萼天桃照兩花
分庭含珮響隔扇偶粧華
迎風俱似雪映綺共如霞
今宵二

神女併在一仙家

王勣

詠妓詩云妖姬飾淨粧窈窕出蘭房日照當軒影風吹
滿路香早時歌扇薄今日舞衫長不應令曲誤持此試


周郎

勣武德貞觀間人有集五卷

竇威

出塞曲云匈奴屢不平漢將欲縱橫看雲方結陣却月

始連營潛軍渡馬邑楊旆掩龍城會勒燕然石方傳車
騎名威字文蔚沈遠有器局貫覽羣言諸兄詆為書癡
武德初為內史令



唐詩紀事卷五